



बेथलेहेम सहर रे पा इस्राएल कली सासन पाइब का जाकब

मीका

ब्रेक्ब मुर: मीका इस्राएल डा दक्खिन हेब्रोन नु गाजा सहर आस दाते मोरेशेथ डा मुर बाक्त। मेको आ नें आ अर्थ “परमप्रभु यावे खोदेशो सुइ मबाक्ब” देशो बाक्ब। मीका आमोस खोदेशो पा रू डा गेय पाइब बाक्त। मेको अस्सुर डा लडाइ पाइब आन डोंइती रे प्रोक्शा, यरूसलेम सहरम परमप्रभु यावे आ लोत्र पशो बाक्त। एको किताब मीकामी ब्रेक्शो बाक्त।

गेना ब्रेक्शो: मीकामी ७५०-७२३ बि. सी.म परमप्रभु यावे आ लोत्र पशो बाक्त। मेकोमी सामरीया खतम दुम्चा क्येडा डोंइती मेको आ पर्बम परमप्रभु आ लोत्र पशो बाक्त। *मीका १:६* हिज्कीयाह पिप दुम्शो ६ बर्स दुम्ची ना ७२२ बि. सी. सामरीया खतम दुम्शो आ पर्बम चहिं मीकामी मारेइ मब्रेक्शो बाक्त। मोपतीके मेकोमी एको किताब ७२२ बि. सी. क्येडा डोंइती ब्रेक्शो बाक्त।

मार ब्रेक्शो: परमप्रभुमी थुं नाइक्चा गेब। इस्राएल नु रागी रागी डा मुर नेल्ल आन कली मस्सीह सोइक्ब। मेकोमी आ गे जाक्ब मुर आन कली श्येत रे प्रोंइब।

सामरीया नु यरूसलेम कली निसाफ

१ परमप्रभु यावेमी मोरेशेथ डा मीकाह कली लोत्र पाण्टु। मेना यहूदा रागीमी योथाम पिप बाक्त। मेको आ नोले आहाज नु मेको आ नोले हिज्कीयाह पिप दुम्ताक्स। मिनु मेको परमप्रभु यावे आ लोत्र नु आ कोंइतीके सामरीया नु यरूसलेम आस पर्वम बाक्त।

येरमीया २६:१८; यसैया १:१

२मिनु परमप्रभु यावेमी मार कोंइशो नु देशो बाक्त देशा हना “जात जात डा मुर, गे नेल्लेमी नोफा दाइक्तीन। रागी नु मेकेर बाक्ब नेल्लेमी नेनीन। परमप्रभु, परमप्रभु यावे आ बाक्तीके रे पा इन मरिम्शो पशो आ पर्वम सांकछी दुम्ब। ३लो कोवडीन, परमप्रभु यावे आ बाक्तीक रे जाक्ना जाक्न बाक्ब। मेको यीब नु रागी डा लाइशो डांडाम गाक्ब। आमोस ४:१३ ४मी आ नेक्था मयीन यशो खोदेशो पा, लुकच लतीकेमी ब्वाक्कु शाइशो खोदेशो पा, मेको आ थेक्शो डांडापुकी याइनीम। मिनु दिंमपुकी ब्रोल्नीम। ५मेको नेल्ल याकूब आ मरिम्शो पशो नु इस्राएल डा मुर आन पाप आ पर्वम दुम्शो बाक्ब। याकूब आ मरिम्शो पशो मार बाक्बा? मेको सामरीया ममाइ डा? यहूदा डा लाइशो डांडा मार बाक्बा? मार, मेको यरूसलेम ममाइ डा? येरमीया २३:१३-१४ ६मोपतीके गो सामरीया कली फुल्लु तेल्तीक सेल्लुड। मेको अडगुर खुम्तीक रू दुम्ने चाण्ब। गो मेकेर डा फुल्लु दिंमम ताइक्नुड। मिनु मेको आ खिं प्रेशा, आ जग ग्रुंइनुड। ७राजा १६:२४; होसे १४:१ ७मिनु मेको आ मूर्ति नेल्ल प्रोल्चा पुंइसीनीम। मेको आ गेय पा चेम्शो क्येट नेल्ल मीम हुम्चा पुंइसीब। गो

मेको आ मूर्ति नेल्ल खतम पोक्नुड। मारदे हना मेको नेल्ल तेल्लेम पा चेम्शो क्येट खोदेशो पा खुण्शो बाक्नीम। मोपतीके मेको तेल्लेम पा चेम्शो क्येट खोदेशो पा जाम्शा लाइनीम” दैत। होसे २:७,१४

यहूदा सहर कली श्येत दुम्ब

८मिनु गो मेको आ पर्वम रोंका पा डाक्ना डाक्न बाक्नुड। श्येतथ खोइल नु भेत्रे गाक्नुड। गो सिवार खोदेशो पा ग्रीनुड। मिनु बुक्स खोदेशो पा ग्रीनुड। ९मारदे हना मेको आ गार मसाब। मेको यहूदा सम्म जाक्शो बाक्ब। मेको आं मुर आन बाक्तीक यरूसलेम सहर डा ठेयब लाण्चो सम्म जाक्दीशो बाक्ब। १०एको लोत्र गाथ सहरम मनेपतीन। मिनु डाक्सीन मडाक्कीन। बेथ-लेआफ्रामी इन पियाम फुरक फुंइसीन। २सामुएल १:२० ११शाफीर सहर डा मुरपुकी, भेत्रे दुम्शा, मुने दोक्शा इन लां लने। सानान सहर डा मुरपुकी लाडगा मग्रूनीम। बेथ-एचेलम डा मुर रोंका पाइनीम। मुल रे इ कली वारच पाइब मबाक्नीम। १२मिनु मारोथ सहर डा मुरपुकीम हिंन हिंन रिम्शो दुम्तीके रिम्ना रिम्न बाक्नीम। परमप्रभु यावे रे हिंचा डा श्येत यित। मिनु मेको यरूसलेम डा ठेयब लाण्चो सम्म जाक्शो बाक्त। १३लाकीश सहर डा मुरपुकी, शारा आन कली बगीम फ्रेंशा लने। गे सियोन सहर डा मुर आन कली पाप पपाइक्तीनी। मिनु मेको कली पाप पपाइक्ब, गे बाक्नीनी। इस्राएल आ मरिम्शो पतीके इन दातेम थीसीब। १४मोपतीके गे मोरेशेथ-गाथ सहर कली आ गाक्ची ना डा कोसेली गेचा माल्नीनी। अकजीब सहर डा मुर इस्राएली आन पिप आन कली

ब्वाक्कु मबाक्तीकेम ब्वाक्कु बुक्शो खोदेशो बाक्नीम। १५मिनु मारेशा सहर डा मुरपुकी, गो इन कली ग्रापाइक्चा कली मुर का चाक्नुड। मेको इस्राएल डा मान ततीके अदुल्लाम सम्म जाक्ब। १६मिनु इन दाक्शो आल आन पर्बम इन चां प्रेक्कीन। चां नेल्ल प्रेक्शा, गिदद खोदेशो दुमीन। मारदे हना इन आल नेल्ल ग्याइश्शा, मुर आन रागीम लाइक्चा पुंडसाक्म।

मरिम्शो ठेयब मुर आन पर्बम लोव्र

२ आबी आबी, सु सुम आन ब्राख्येम गोल्शा पाप नु मरिम्शो पचा ला मिम्नीमी। मिनु नां सौव्रम चोटीन मेको आन मिम्शो पाइनीम। मारदे हना मेको पने चाप्ब बाक्नीम। ३मेकोपुकीम रिम्शो रू तशा वाल्शा, रोइक्नीम। रिम्शो खिं रोइक्नीम। मोपा मेकोपुकीमी मुर आन खिं नु आन थेरशो रू आंम के सेल्नीम।
 व्यवस्था ५:२१; हितोपदेस २४:१५; यसैया ५:८
 ३मोपतीके परमप्रभु यावेमी मार दैत दैशा हना “गो मेको आन खिं डा मुर आन कली श्येत गेनुड। मेको रे आंम कली प्रॉइने मचाप्नीम। ठेयब लेशशा गाक्ने मचाप्नीम। मारदे हना मेको थम श्येत जतीक नाक्त बाक्ब। आमोस ५:१३ ४मेको नाक्ती मुरपुकीमी इन पर्बम शुक्शी पा कुम्सो पाइनीम। मिनु इन पर्बम रोंका पा डाक्नीम। मिनु मुरपुकीमी ‘गोपुकी थमा पा खतम दुम्तक। आंइ मुर आन थेरशो रू अर्को मुरुम लाइक्नीम। आंइ रू आंइ जोरी सत्रु आन दातेमी योक्सीनीम’ देंनीम” देंत। ५मोपतीके गेपुकी परमप्रभु यावे आ मुर आन योक्शो रू रोइक्चा मताइनीनी। ६मेकोपुकीम “परमप्रभु

यावे आ लोव्र मपने” देंनीम। तन्न लोव्र पाइनीम। मिनु मेकोपुकीमी “मोदेशो श्येत आंइ कली मदुम्ब” देंनीम। आमोस ७:१६ ७याक्ब आ खिं डा मुरपुकी, मोदेशो देंचा दुम्बा? मार, परमप्रभु यावे आ फाल्तीक सक्ति नुम्मे डा? मेकोमी मोदेशो पाइबा डा? परमप्रभु यावेमी रिम्शो पाइब आन कली रिम्शो लोव्र मपाइबा डा? आमोस ६:३ ८तन्न गे आं मुर आन डोंइती जोरी सत्रु खोदेशो दुम्शा बाक्नीनी। रिम्शो पाइब मुर आन फेक्तीक रोइश्शा लाइक्नीनी। लडाइ मदुम्शो बाक्ब, दे इन कली थमा सुइश्शा गाक्ब आन कली मोदेशो पाइनीनी। ९गेपुकीम आं मुर आन मीश आन कली आन दारशो खिं रे गुंडनीनी। मेको आन आलपुकी रे आं गेशो आसीक गेना हना यो कली रोइश्शा लाइक्नीनी। १०बोक्शा लने। मारदे हना एकेर इन नाइक्तीक ममाइ। मारदे हना एको प्रांघ्रा दितीकेमी मुर आन कली मरिम्शो सेल्ब। मेको मारेइ पने मचाप्चा डा पा खतम सेल्शो बाक्ब। ११तेकोइ मुरुमी जोल पा दूली लोव्र पशा “गो इ कली अडगुर शांबु तूचा नु रक्सी तूचा आ पर्बम लोव्र पाइनुड” देंत हना, मेको मुर मेको आन कली गारचा डा लोव्र पाइब बाक्ब।

श्येत रे प्रॉइशो

१२परमप्रभुमी “याक्ब गो थमा पा नेल्ल इन कली खुप्शा पुक्नन्नी। गो इस्राएलम लीशो आन कली थमा पा खुप्नुडमी। गो मेको आन कली भेडा बगालम वोइश्शो खोदेशो पा नु योव्रतीकेम योव्रशो खोदेशो पा वोइक्नुड। मिनु मेकेर शुश मुर दुम्नीम।
 येरमीया ३१:१०; इजीकीएल ३६:३७; यसैया ५२:१२
 १३लां कोंइब मेको आन डोंइती गाक्ब।

मेकोपुकी लाप्यो रे पा गूशा गाकनीम। मेको आन पिप मेको आन डोंइती गाकब। परमप्रभु यावे मेको आन डोंइडोंइती बाकब” देंत।

ठेयब मुर आन कली हुइश्शो

३ मिनु गो “गे, याकूब आ ठेयब मुरपुकी नु इस्राएली आन खिं डा हुकुम पाइबपुकी, इन नोफा दाइश्शा नेनीन। गे ठीक निसाफ तुइक्चा ममाल्नीनी डा? *येरमीया ५:५* २गेपुकी रिम्शो पचा काइ मदाकनीनी। मिनु मरिम्शो पतीक दाकनीनी। गेपुकीमी आं मुर आन कुशुल उकनीनी। मिनु मेको आन रुश रे आन श्ये रिक्नीनी। ३गेपुकीमी आं मुर आन श्ये ब्वाइतीनी। मेको आन कुशुल उक्तीनी। मिनु रुश टुक्रा टुक्रा पा जिक्तीनी। मिनु बोसुम क्येतीक श्ये खोदेशो पा मेको आन कली टुक्रा टुक्रा पा चेक्तीनी” देंती। *भजन संग्रह १४:४* ४मिनु मेकोपुकीमी परमप्रभु यावे कली पुंडनीम। तन्न मेकोमी मेको आन पुंडशो लोव्र मलेप्व। आ अरेशो मटितीके मेकोमी मेको आन क्येडा आ कुल खुइक्ब।

हितोपदेश १:२८; इजीकीएल ८:१८

५मिनु परमप्रभु यावेमी आ लोव्र पाइब आन पर्वम मार देंत देंशा हना “सुम आं मुर आन कली दूली लांम गाक्पाइक्बा? आं लोव्र पाइबपुकीमी, सुमी मेको आन कली जचा गेमेनु ‘रिम्शो दुम्ब’ देंनीम। तन्न मेको आन कली जचा मगेमेनु, मेको आन कली लडाइ तोचा कली ठीक दुम्नीम। ६मोपतीके इन कली मारेइ मततीक नाकदो दुम्ब। परमप्रभु रे मारेइ मतुइक्चा डा पा छिडछिड दुम्नीनी। आं लोव्र पाइब आन कली नां रिक्ब। मिनु

नाक्त मेको आन कली छिडछिड दुम्ब। ७कोंइतीक ताइबपुकी शिशी मताइनीम। टुना मुना पाइबपुकी मुने दोकनीम। मेको आन शोव्र सुम्सीचा माल्नीम। मारदे हना परमप्रभुमी मेको आन कली लोव्र मलेप्व। *आमोस ८:१२* ८तन्न गो सक्ति पाइश्शो बाक्नुड। गो परमप्रभु यावे आ सोक्ती, ठीक निसाफ पतीके नु आ सक्तिम ब्रीशो बाक्नुड। गो याकूब आ हेंथे पशो नु इस्राएल डा मुर आन पाप शेंचा कली मोदेशो दुम्शो बाक्नुड। *यसैया ५८:१* ९याकूब आ खिं डा ठेयब मुरपुकी नु इस्राएल डा खिं खिं डा हुकुम पाइबपुकी एको लोव्र नेनीन। गेपुकीमी ठीक निसाफ पतीक कली ग्रांगा दीनीनी। मिनु ठीक लोव्र नेल्ल दूली सेल्नीनी। १०गेपुकीमी हुश शाइक्पाइश्शा सियोन कली सेल्नीनी। मिनु यरूसलेम कली मरिम्शो पतीकेम सेल्नीनी। *हबकुक २:१२* ११मेकेर डा ठेयब मुरपुकीमी घूस जशा निसाफ पाइनीम। मेकेर डा चढेबपुकीम शेंशो डा क्येट ताकनीम। परमप्रभु यावे आ लोव्र पाइबपुकी क्येट तचा कली नोले दुम्ब लोव्र पाइनीम। मो हना यो मेकोपुकीमी ‘परमप्रभु यावे आंइ दातेमी बाक्ब। गो श्येत मजाइनीकी’ देंनीम। *येरमीया ७:४* १२मोपा इन पतीके सियोन वाक्शो रू दुम्ब। यरूसलेम ब्रेश्शो खिं डा फुल्लु देल्तीके दुम्ब। परमप्रभु यावे आ खिं डा डांडा ब्वाकी दुम्शो बाक्ब” देंत।

भजन संग्रह ७६:१; येरमीया ६:१०; येरमीया २६:१८

परमप्रभु आ डांडा

४ मिनु नोले डांडा नेल्ल आन क्येडा परमप्रभु यावे आ खिं बाक्शो डांडा लाइश्शो दुम्ब। मिनु मेको नेल्ल

आन क्येडा ग्येतथ लाइब बाकब। मिनु शुश मुर मेकेर लाइनीम। *यसैया २:२-४* ^२मिनु रागी रागी डा मुरपुकी मेकेर जाकशा, मेकोपुकीमी “जाक्कीन। गोपुकी परमप्रभु यावे आ डांडा लय। याकूब आ परमप्रभु आ खिं लय। मेकोम इं कली आ लां कोंडब। मिनु गोपुकी मेको आ लांम गाक्ने चाप्यल। मारदे हना शेंतीके सियोन रे नु परमप्रभु यावे आ लोव्र यरूसलेम रे गूब” देंत। *लूका २४:४७* ^३मेकोमी शुश जात डा मुर आन दातेमी निसाफ पाइब। मिनु डोन बाकशो बोल्यो रागी रागी डा मुर आन कली निसाफ पाइब। मिनु मेकोपुकीमी आन तरवार चेम्शा, फाली सेल्नीम। आन तूतीक भाला चेम्शा गुये सेल्नीम। मिनु रागी रागी डा मुर आन दातेमी लडाइ मपाइनीम। मेकोपुकीमी गेनायो लडाइ मशेंसीनीम। ^४तन्न मुर नेल्ल आन अडगुर नु फोव्रशी रवा आन पुंम नित्नीम। मिनु मेको आन कली सुइमी हिंच मकोंइनीम। मारदे हना मुर नेल्ल आन परमप्रभु यावेमी लोव्र पशो बाकब। *१राजा ५:५; जकरिया ३:३०* ^५मिनु “जात जात डा मुर नेल्ल आन देवी देवता आन नेंम गाक्नीम। तन्न गोपुकी चहिं गेना हना यो परमप्रभु यावे, इं परमप्रभु आ नेंम गाक्नय” देंतेकम।

परमप्रभु आ मुरपुकीम शिशी ताइनीम

^६परमप्रभु यावेमी मार देंत देंशा हना “मेको नाक्ती गो खोइल मदुक्ब आन कली खुप्नुडमी। मिनु गो खेरशो नु श्येत जशो आन कली खुप्नुडमी। *येरमीया ३१:८; ब्यवस्था ३०:४* ^७मिनु खोइल मदुक्ब आन कली लीशो मुर आन दातेम वोइक्नुड। खेरचा पुंइसीशो आन कली बोल्यो रागी

डा मुर सेल्नुडमी। मिनु परमप्रभु यावेमी मेको आन कली सियोन डांडा रे गेना हना यो कली सासन पाइब।

^८आं बगाल बाक्तीक डांडा, सियोन आ तमी इ सांद मिगदाल-एदेर सहर सम्म जाक्दीपब। गे डोंइती डा राज्य लेंशा ताइनेवे। यरूसलेम डा तमीम आ राज्य लेंशा ताइब।

^९मुल गे मारदे वाइ ब्रेशशा ग्रीनेवे? मार इ पिप मबाक्बा डा? इ अर्ती गेब जाम्शा लमा? मिनु मारदे आल थितीक रोइ पशो मीश मुर खोदेशो पा वाइ ब्रेत्नेवे? *येरमीया ८:१६* ^{१०}सियोन आ तमी, आल थितीक रोइ पशो मीश मुर खोदेशो पा वाइ ब्रेशशा ग्रीडो। मारदे हना मुल गे एको सहर प्रोंइचा माल्नेवे। मिनु खिं मबाक्तीकेमी बाक्तीक सेल्चा माल्नेवे। गे बेबीलोनम लचा माल्नेवे। मिनु मेकेर रे प्रोंइचा पुंइसीनेवे। मेकेर परमप्रभु यावेमी इ कली इ जोरी सत्रु आन गुइ रे प्रोंइब। ^{११}मुल शुश रागी रागी डा मुर इ पर्बम दूली पा बोक्शा ‘सियोन ग्रांग्रा दिशो दुम्ल। गो मेको कली कोव्रना कोव्रन बाक्चा तांइसेक्ल’ देंनीम” देंत। ^{१२}तन्न मेकोपुकीमी परमप्रभु यावे आ मिम्शो मतुइक्नीम। मेकोपुकीमी आ पचा चिक्शो मतुइक्नीम। परमप्रभुमी मेको आन कली खला डा अन्न खुप्शो खोदेशो पा खुप्ताक्व। ^{१३}सियोन आ तमी बोक्शा, अन्न तुपो। मारदे हना गो इ ग्रोव्र फलाम के सेल्नुड। गो इ गेंग्रे कांसा के सेल्नुड। मिनु गे शुश जात जात डा मुर आन कली फस पोक्नेवे। मेको आन रोइश्शो परमप्रभु यावे कली गेनेवे। मिनु मेको आन शोंप रागी नेल्ल डा परमप्रभु यावे कली चढेनेवे।

बेथलेहेम रे सासन पाइब का जाकब

५ गे गारो हिरशो सहर बाकनेवे। लडाइ पाइबपुकीमी इ कली पुन्नीम। मिनु इस्राएल कली सासन पाइब कली कोक्केम चोवचोम तुप्नीम।

उत्पत्ती ३५:१६; मत्ती २:५-६; यूहन्ना १:१-२

२तन्न गे बेथलेहेम एफ्राथाह, गे यहूदा डा सहर आन दाते डा आइक्च बाक्ते हना यो, इ रे पा आं पा डा इस्राएल कली हुकुम पाइब का जाकब। मेको साइ डांइती रेन बाक्शो बाक्त। *यसैया ४:१७; यसैया ११:१२*

३मिनु परमप्रभु यावेमी इस्राएली आन कली काइ मकोव्रब। मिनु मीश मुरुमी आल थिवा नोले ला कोव्रब। मेना लीशो मुरपुकी इस्राएल डा मुर नु गारशा, लेत्चा पुंडसीनीम। *इजीकीएल ३४:२३* ४मिनु मेकोमी परमप्रभु यावे आ सक्तिमी आ बगाल आन कली योव्रब। मिनु मेकोमी आ परमप्रभु यावे आ ठेयब नेमी आ गेय पाइब। मिनु मेकोपुकी रिम्शो पा बाक्नीम। मारदे हना मेको रागी डा सुर सम्म नेल्ल क्येडा ठेयब दुम्ब। *यसैया ६:५; एफिसी २:१४* ५मिनु मेकोमी थुं नाइक्चा गेब। मिनु अस्सुर डा मुर इं रागी ओव्रशा लडाइ पचा गोम्तेक्म हना, गोपुकीमी ७ जना गोठला नु ८ जना हुकुम पाइब वोइक्नीकी।

६मेकोपुकीमी अस्सुर रागी कली तरवारम हुकुम पाइनीम। निम्रोद रागी कली शोइशो तरवारमी हुकुम पाइनीम। मिनु मेकोपुकीमी इं कली “अस्सुरी इं रागी ओव्रतेक्म हना यो, इं कली प्रोइनीम। इ रागी डा सांदम जाक्तेक्म हना यो, इं कली प्रोइनीम” देनीम। *भजन संग्रह ११०:३*

७याकूब आ लीशो मुर शुश आन दातेम परमप्रभु यावे रे जाक्शो सीत नु घांस तार जुक्शो रेउ खोदेशो दुम्नीम। मेकोमी “सुइ मुरुम वारच पाइनीमी को” दे मकोव्रनीम। मिनु मुर आन आस मपाइनीम। ८याकूब आ लीशो मुर शुश आन दातेमी ब्वाकी डा गुप्स खोदेशो दुम्नीम। मेकोपुकी भेडा गोठम बाक्शो गुप्स आ चाइक्ब खोदेशो दुम्नीम। गुप्स मेकेर लाम्तेक्म हना, साइशशा ब्वाइनीम। मिनु सुइमी मेको आन कली प्रोइने मचाप्नीम। ९मिनु परमप्रभु यावेमी “गे इन गुइ इन जोरी सत्रु क्येडा बोल्यो दुम्शा ग्रानीनी। मिनु इन जोरी सत्रु नेल्ल खतम दुम्नीम। *जकरिया ६:१०*

१०मेको नाक्ती गो इन शारा इन दाते रे खतम पोक्नुड। इन बग्गी प्रेशशा गेनुड। ११गो इन रागी डा सहर नेल्ल खतम पोक्नुड। गो इन बोल्यो दरवार नेल्ल प्रेतनुड। १२गो इन टुना मुना पशो आ पर्बम इन कली खतम पोक्नुड। मिनु इन दातेमी साहीत कोव्रब आन कली बाक्चा मगेनुड। *जकरिया १३:२* १३गो इन दाते डा मूर्ति नेल्ल खतम पोक्नुड। इन पूजा पचा कली खुक्शो फुल्लु खतम पोक्नुड। मिनु इन गुइमी सेल्शो थोव्रक आन डांइती मबाप्नीनी। १४गो इन दाते डा मूर्ति पाइशशो थाम तुल्शा बेरपाइक्नुड। मिनु इन सहर आन कली प्रेतनुड। १५गो गाइशशा चुरशा रागी रागी डा मटीब मुर आन कली क्येक्क लेत्नुडमी” देंत।

परमप्रभु पाप आ पर्बम गाइशशो

६ परमप्रभु यावेमी मार देंबा, इन नोफा दाइशशा नेनीन “बोक्कीन। मिनु पहाड आन डांइती इन देंचा माल्शो

लोव्र शोव्रडीन। मिनु डांडापुकीमी इन लोव्र नेन्मेक्ल। इजीकीएल ६:२ २गे डांडापुकी नु गेना हना यो लीब रागी डा जग, परमप्रभु यावेमी दोपा निसाफ पाइबा, मेको नेनीन। मारदे हना मेकोमी आ मुर आन कली निसाफ पचा चिक्शो बाक्ब। आ दोस गेशो नोफा दाइशशा नेनीन। मारदे हना आ मुर आन कली मेको के लोव्र बाक्ब। मेकोम इस्राएल कली निसाफ पाइब।

३आं मुरपुकी गो इन कली मार पडा? गो इन कली मार श्येत गेडा? आं कली देनीन। येरमीया २:५ ४गो इन कली इजीप्त रे एक चाक्तन्नी। मिनु इन वाइलीम वाइल दुम्शो रागी रे प्रोइतन्नी। इन कली लां कोंइचा कली मोसा, हारून नु मिरयाम आन कली सोइक्ताक्डमी। प्रस्थान १५:२० ५आं मुरपुकी, मोआब डा पिप बालाकम मार सल्ला पशो बाक्मे, मेको मिम्तीन। बेओर आ तौ बालाममी मेको कली मार लोव्र लेत्ता, मेको मिम्तीन। शितीम रे गिल्याल सम्म डा लांमी गाक्शोनु, मार मार दुम्मे, मेको मिम्तीन। मिनु परमप्रभु यावेमी इन कली दोपा प्रोंइशो बाक्मे, मेको तुइक्नीनी” देंत। गन्ती २२:-२४:-; यहोसु २:१; यहोसु ४:१६

६गो मार कुरशा परमप्रभु यावे आ डोंइती जाक्डा? मार चाक्शा, इर डा परमप्रभु आ डोंइती बाम्डा? मार चोशा चढेतीक चाक्शा, आ डोंइती जाक्डा? मेको आ डोंइती बर्स का दुम्शो ब्यफ चाक्शा, जाक्डा? भजन संग्रह ५०:८-१३; आमोस ५:२२ ७परमप्रभु यावे हजार हजार सांड तशा ग्येरबा? मार १० हजार तेल के खोला तशा ग्येरबा डा? गो आं पाप आ पबर्म आं डोंइती जरमेशो तौ गेचा

माल्नुडा? मिनु आं थुं डा पाप आ पबर्म आं आल गेचा माल्नुडा? ८परमप्रभु यावेमी इन कली, गे बेक्शा लाइब मुर, इन कली मार रिम्शो बाक्मे नु मार पचा माल्नीनी, मेको देशो बाक्ब। मार देशो बाक्ब देशा हना, गे ठीक निसाफ पने, शिशी पतीक कली दाक्तीन। मिनु इन परमप्रभु आ डोंइती ब्रेम्शो दुम्शा गाक्कीन। ब्यवस्था १०:१२; १सामुएल १५:२२

यरूसलेम कली दोस गेशो

६परमप्रभु यावेमी सहर कली “आं कली मान पा हिंचा इन कली श्येत रे प्रोंइतीक दुम्ब। गे थर डा मुर नु सहर डा गुम्तीक डा मुर आन लोव्र नेनीन। १०गो मेको आ अरेशो मटीब आ खिं डा मरिम्शो पा चेम्शो शोंप प्रेंदु? इन आइक्च सेल्शो सराप रशो पुक्तीक प्रेंदु? लेवी १६:३५ ११मार गो इन मरिम्शो नाक्तीक नु जोल पा नाक्तीक ढक के थैलो वोइक्ब कली दोस मताइब सेलु? हितोपदेस २०:१० १२मेको आ शोंप पाइशशो मुरपुकी हुश खाक्श पोक्तीकेम ब्रीशो बाक्नीम। मेको सहर डा मुरपुकी जोल पाइनीम। मेको आन शोव्र जोल पतीकेमी ब्रीशो बाक्ब। १३मोपतीके गो इ कली खतम पोक्चा गोशो बाक्नुड। गो इ कली इ पाप आ पबर्म श्येतथ पोक्नुड। १४गे जचा थोव्रक जाइनेवे, तन्न मरूनेवे। मिनु इ कोव्रज शोव्रलु बेक्शोन बाक्ब। गे खेक्चा दा खेक्नेवे, तन्न उप्शा वोइक्ने मचाप्नेवे। गे मार खेक्नेवे, मेको नेल्ल लडाइम खतम दुम्ब। १५गे मार मार शोक्चा दा शोक्नेवे। तन्न खुप्चा मताइनेवे। तेल रवा आ फल खाक्चा दा खाक्नेवे, तन्न इ रांम तेल खेक्चा मताइनेवे। गे अडगुर खाक्चा

दा खाक्नेवे, तन्न अडगुर शांबु तूचा मताइनेवे। *ब्यक्स्था २८:३८-४०; आमोस ५:११*
१६गे ओम्री आ अरेशो लोव्र पाप्तीवी। मिनु आहाब आ खिं डा मुर आन पशो नेल्ल पाप्तीवी। मिनु मेको आन गेशो अर्ती टिप्तीवी। मोपतीके गो इ कली खतम पोक्नुड। मिनु इ मुर आन कली शुक्शी पतीक सेल्लुड। गे आं मुर आन गाइशो ताइनेवे” दे ब्रेन्न ब्रेन्न बाक्ब।
१राजा १६:२६-३३

इस्राएल कली श्येत दुम्शो

७ गो दोदेशो पा श्येत जशो बाक्नुडा? गो फल सिशशा नोले, अडगुर रू डा सिला माल्ची नोले मारेइ जचा मताइनुड। आं माल्लो डोंइती मीशो फोव्रशी यो मबाक्ब। *भजन संग्रह १२:२; यसैया ५७:१* **२**थमा सुइक्चा पुंडसीब मुर रागी रे जाम्शा लाम्तेक्म। मिनु गेना हना यो रिम्शो पाइब मुर मलीशो बाक्नीम। मुर नेल्ल मुर साइक्चा कली बाप्शा बाक्शो बाक्नीम। मुर नेल्लेमी ब्वारद दाइशशा आंम लोक्ब कली साइक्चा माल्लो बाक्नीम। **३**मेकोपुकी मरिम्शो पचा कली जोक्ब बाक्नीम। आन ठेयब मुर नु निसाफ पाइबपुकीमी घूस जाइनीम। सक्ति पाइशोपुकीमी मार मिम्तमे मेकोन पाइनीम। मोपा ठीक पतीके कली दूली सेल्लनीम। **४**मेको आन दाते डा नेल्ल क्येडा रिम्शो मुर चू रवा खोदेशो बाक्ब। मेको आन दाते डा गेना हना यो रिम्शो पाइब थरपु हिरशो चू खोदेशो बाक्ब। इन खाल पाइब आन नाक्त जाक्शो बाक्ब। मेको नाक्ती इन कली कोव्रबमी इन कली गुम्थ जाक्ब। मुल मेको आन कली खतम सेल्लिक नाक्त जाक्ब। **५**इन

वारच कली थमा मसुतीन। इन दाक्शो मुर कली थमा मसुतीन। गे नु काथा इप्शो मीश नु यो होस पा लोव्र पने। *येरमीया ६:३-४*
६मारदे हना तौमी आ आफ कली मरिम्शो पाइब। तमी आ ममा आ पर्बम दूली पाइब दुम्ब। चाइमीम आ शिमी आ पर्बम मरिम्शो पाइब। आंम खिं डा मुर इन जोरी सत्रु दुम्नीम। *मती १०:३५-३६* **७**तन्न गो परमप्रभु यावे गे कोव्रनुड। गो आं कली श्येत रे प्रोंइब परमप्रभु कली रिम्नुड। आं परमप्रभुमी आं पुंडशो नेब।

परमप्रभुमी श्येत रे प्रोंइब

८मिनु “आं जोरी सत्रु आं कली शुक्शी पा मग्येरसीन। गो गोलती हना यो, बोक्नुड। गो छिडछिडम बाक्ती हना यो, परमप्रभु यावे आं छेडछेड बाक्ब। *ओबदिया १:१२; भजन संग्रह २७:१* **९**आं कली निसाफ पा वारच मपवा सम्म गो परमप्रभु यावे आ गाइशो फाल्चा माल्लुड। मारदे हना गो मेको कली पाप पाता। मेकोमी आं कली आ शिशी तपाइक्चा कली छेडछेडम गुंडब। *येरमीया १४:७* **१०**मेना आं जोरी सत्रुम मेको ताइनीम। मिनु मुने दोक्नीम। मारदे हना मेकोपुकीमी डोंइती “परमप्रभु यावे, इ परमप्रभु ते बाक्म?” देशो बाक्तेक्म। गो मेको आन खतम दुम्शो ताइनुड। मुल यो मेकोपुकी लां डा हिलो खोदेशो पा दिम्चा पुंडसीशो बाक्नीम। *भजन संग्रह ७६:१०*

११गे इन गारो लेंशा सेल्लिक नाक्त नु इन सांदपुकी डोन डोन सम्म चाक्दीत्तीक नाक्त जाक्शो बाक्ब। **१२**मेको नाक्त अस्सुर नु इजीप्त रे शुश मुर जाक्नीम। इजीप्त रे युफ्रेटीस सम्म, समुन्द्र रे समुन्द्र सम्म नु पहाड रे पहाड

सम्म डा शुश मुर इन बाक्तीक जाक्नीम।
 १३तन्न रागी रागी नेल्ल श्येत्य दुम्नीम।
 मुर आन मरिम्शो पशो आ पर्बम मोदेशो
 दुम्ब” दैत।

परमप्रभुम इस्राएल कली शिशी पाइब

१४गे इन मुर आन कली कोक्केम
 योव्रडीन। मेको ब्वाकीम बाक्शो बगाल
 इन के बाक्ब। मेको रिम्शो बाक्तीकेम
 बाक्नीम। मेको आन कली डोंइती डा
 खोदेशो पा बाशान नु गिलादमी जोचा
 गेन। मीका ५:३; येरमीया ५०:१६ १५गेपुकी
 इजीप्त रे गूशो नाक्त खोदेशो पा गो इन
 कली छक लाक्चा डा गेय कोंइनुड।
 १६मेको रागी रागी डा मुरपुकी शुश सक्ति
 पाइशो बाक्तेक्म हना यो, मेको तशा,
 मुने दोक्नीम। मेकोपुकीम आन गुडम आन
 कुल सुम्सीनीम। मिनु मेको आन नोफा
 लाटा दुम्ब। १७मेकोपुकीम बुस्स खोदेशो
 नु खपीम गेशा गाक्ब जन्तु खोदेशो पा,

खप तुक्नीम। मेको आन बोल्यो दरवार
 रे हिंशा खिंखि पा गूनीम। मेकोपुकी
 हिंशा परमप्रभु यावे, आंइ परमप्रभु गे
 लेत्नीम। मिनु मेकोपुकीमी इन कली मान
 पा हिंनीम। भजन संग्रह ७२:६ १८इन खोदेशो
 परमप्रभु अर्को सु बाक्बा डा? गे ठीक
 मपशो क्याम्ब बाक्नीनी। इन लीशो मुर
 आन मरिम्शो पतीके माफ गेनीनी। गे गेना
 हना यो गाइक्स डा गाइक्स मबाक्नीनी।
 तन्न शिशी पचा कली ग्येरशा बाक्नीनी।
 भजन संग्रह १०३:३,८-१३ १६मेकोमी आंइ
 कली लेंशा शिशी पाइब। मेकोमी आंइ
 पाप कली दिम्ब। गे आंइ पाप शुश लुक्च
 लशो समुन्द्रमी ताइक्नीनी। २०गे याक्ब
 कली इन थमा सुइक्तीके कोंइनीनी।
 मिनु अब्राहाम कली दाक्शा मप्रोंइतीके
 कोंइताक्नी। गे साइ डोंइती आंइ किकी
 पिप आन कली कसम जशा लोव्र गेशो
 बाक्तीनी। उत्पत्ती २८:१३-१५; उत्पत्ती २२:१६-१८;
 लूका १:७३